

Par attīceibom, emocejom, lauku dorbiem i pīdzeivuotū šovā “Lauku sēta”.

Saruna ar šova dalineicom Jogitu i Jolantu Augšpūlem.

Kai jau īrosts, ari itymā godā pīduovojam īpazeit myusu nūvoda ļauds. Lai paruodeitu sarunu pēc vareibys dabiskuoku, itūreiz tei ir saraksteita latgaliski.

Lelu puorsteigumu ar sovu daleibu televizejis šovā „Lauku sēta” mums beja saryupejušys Rūžkolnu pogostā dzeivojūšuos, smaideiguos muosys Jolanta i Jogita Augšpūles. Kai jau zynoms, juos beja tuos šova daleibneicys, kas tyka da šova finala. Itūgod golvonuo bolva, par kuru sasaceņte daleibnīki, beja Fiskars dorba instrumenti pīcu tyukstūšu vierteibā. Šovs tyka filīmāts pārnajā vosorā, tok tik naseņ, janvara suokumā, beidzēs tuo puorraideišona TV. Iz sarunu ar muosom sasateikom jūs dzymtajā sātā Lelajūs Stradiškūs.

Augšpūļu saimē jī ir četri bārni — diveji bruoli — Juoņs i Jurs, i divejis muosys — Jolanta i Jogita. Niule lelajim bruolim jau kotram sova dzeive – sova saime, sovi dorbi. Juoņs turpynoj saimnīkuot tāva Jura i muotis Veltys zemnīku saimisteibā, a bruoļs Jurs ar saimi niule dzeivoj i struodoj lkškilē.



Par jūs lelū saimi varātum raksteit vēļ, nu itūreiz vaira parunuosim ar muosom par jūs vosorys pīdzeivojumu — daleibu LNT šovā „Lauku sēta”.

Kuo jius izdūmuojot, ka ir juopīsadola „Lauku sētā”?

Jogita: Es jau īprīkš 2012. godā beja pīsasacejuse daleibai itymā šovā, bet natyku. Beja cīši daudz grybātuoju, lela atlase. Itūgod jau beja izdūmuots, ka dalinīki vareis pīsasaceit pa div. Tymā laikā es beju praksē Guļbinī, izskaiteju škāksteiklā, ka ir dasasaceišona 2016. gods „Lauku sētai”. Zvaneju Jolantai, saceju, ka dasaceišu myus obejis i aizsyuteišu myusu biļdi. Tai kai Jolantys atbiļde beja: „Jā, labi syut!” — es ari aizsyuteju.

Jolanta: Kod Jogita man zvaneja, es tū nautzvēru nūpītnai. Dūmuoju - jei jau reizi beja dasacejuse, natyka – ūtru reizi ari natiks...

Jogita: Puorguoja kaida šaļts, sajiemom aicynojumu iz atlasī. Sadūmuojam, ka jūka pēc varam aizbraukt. Tei atlase nūtyka Reigā, „LNT” studejā.

Pēc tuo, kū ruoda pa TV, navar eisti saprast, cik daudzi jums eisti beja juostruodoj?

Jogita: Eistineibā beja cīši daudzi juostruodoj. Mož vaira filīmēja tod, kod nastruoduojom, navys struoduojom. Jī centēs filīmēt šaļts, kur nūteik kaidys diskusejis ci koč kaida jūkuošonus. Jo tys jau ir šovs, lai byutu cytim interesanti viertīs. Cīši moz paruodeja tū realū dorbu.

Jolanta: Niule, verūtīs televizorā, vyss izaver pavysam cytaižuok. Pa televizoru ruoda tikai dalinīkus kadrā, bet eistineibā vysu laiku apleik beja lela radūšuo komanda, daudzi

vysaidu cytu cylvāku – skaņuojuoju, operatori, intervātoju, režisori, paleigi, fotogrāfs.



Cik daudzi nūtykumu i informacejis palīk aiz kadra?

Jolanta: Cīši daudz, cīši daudz palīk aiz kadra. Kod verīs pa televizoru, vyss izaver cīši vīnkuorši. Vysys tuos emocejis nav radzāmys. Skateituojs nikod nasaprass i navarēs īsadūmuot, kai tys vyss beja. Tys ir pavysam sovaižuok nakai izaver.

Jogita: Vysu šova laiku myus pavadeja spylygtys emocejis, kū navar izstuosteit. Tū var tikai pīdzeivuot. Beja pat taidi breiži, kod kuods varēja pasaceit: „Čau!” i tu iz reizis suoc rauduot, pats pat nasaprūtūt deļkuo... Nazkaidys saspryngums.

Mož spēlē iz nervim tys, ka tei ir sveša vide, sveši cylvāki, tevi vysu laiku filmej i koč kū līk dareit...

Jogita: Pymū laiku beja lels stress i sprīdze, tu napuortrauktai izatrauc, kas nūtikys, kas filmeis. Nu vysa tuo sasprynguma suopēja golva.

Jolanta: Kod nu reizis vieromīs šovu pa televizoru, pyrms tam apsprīdem — naz kaidi poši trokuokī kadri tiks paruodeiti. Bet nā, da gola izaruodeja, ka vyss beja dīzgon labi. Mes jau ari nazynuojom tymuos intervejuos kū vīns par ūtru kurs stuosta...

Voi jamūt daleibu šovā, jums beja koč kaidys plans, strategija — kaidys jius byusit, ar kū atsašķirsit nu cytu dalinīku?

Jolanta: Es nasaceitu, ka mums beja taidys baigais plans. Šova laikā es varbyut drusku pībremzēju sovys emocejis. Nasagribēja koč kaidus skandalus taiseit. Jogita mani bīži mīrynuoja.

Jogita: Tuos kamerys suokumā drusku satrauce. Piec tam lykuos normali, ka kaidys īt pakāļ i koč kū filmej.

Jolanta: Man ari beja pagryuts deļ tuo, ka es asmu pīroduse byut pa sātu, asmu taidys sātyc cylvāks i pieški es beju prūjom nu vysim sovejim, i vēļ nadreikstēju ar jīm sasazynuot...

Jogita: Es to gon varu mienesi naatbraukt iz sātu, maņ tys ruodīs normali.

Jolanta: Es vīna navarātu tū vysu izturēt. Cīši labi, ka mes bejom divatā. Dorbi nabeja pots gryšuokais.

Kū jiusu draugi, saime saceja, ka jius pīsasacejot daleibai itymā šovā?

Jolanta: Mums zynuoja tikai gimine. Draugim mes eisti nasacejom. Cyti beja drusku dusmeigi, ka redz mes jīm nikuo napasacejom, ka asūt kaidi nūslāpumi, bet mes

nagrybējom tai vysim stuosteit... Lai byutu puorsteigums, lai byutum interesanti vērtīs. Kod mes atbraucem iz sātu, cīši daudzi vacuokim, bruolim vaicuoja: „Nu nasok, ka tu nazyni rezultatus?”. Bet jī teišom nazynuoja, leidz 5. janvara catūrdīnes, kod beidze ruodeit šovu. Jī vērēs taipoš kai cyti. Mes nasacejom.

Jogita: Nivīns jau mums natic, bet nu tys tai beja.

Jolanta: Bet tai vacuoki myus atbaļsteja, ka mes guojom. Nu tāvs tik saceja, voi tod teišom sātā nav kuo dareit. (Smajās.) Bet nu, lai mes īmūt, lai puorbaudūt vīna ūtru. Mama beja tikai par. Bruoli ari gribēja, lai mes vinnātu.

Es dūmoju, vysī myusu pusīs cylvāki gribēja, lai jius vinnātu.



Jolanta: Jā, nu nasaguoja. Tys tai forši beja, ka myus atbolsta, ka skotuos. Vairuok nu „fanim” es sajutu uzmaneibu tod, kod šovs beja beidzīs.

Jogita: Jā, tymā vokorā tys beja taids viestuļu i zvonu sprudzīns. Myus atbalsteja draugi, myusu pazinis, nūvoda cylvāki, kuri myus zyna ci tāvu voi muoti pazeist. Tymā vokorā, kod šovs beidzēs, mums raksteja viestulis socialajūs teiklūs, nu cytu nūvodu, nu Bauskys, nu Kuldīgys ar uzaicynuojumu braukt cīmūs. Ari nu Ventspiļs raksteja cylvāki. Tys tai ruodejuos interesanti, ka piļneigi napazeistami roksta...

Jolanta: Maņ ari ir bejs, ka veikalūs voi cytuos sabīdryskuos vītuos cylvāki pīvierš uzmaneibu. Pīmāram, pušdīņu puortraukumā beju aizguojuse iz kopejneicu paēst, koč kas aiz mugorys pajūkuoja: „Vai zvaigznes arī grib ēst?”. Es atbiļdēju, ka zvaigznis ari ād. (Smejās.) Bet reali jau naasam nikaidys zvaigznis. Parosti cylvāki, kai vysī. Nu labi pīsadalejom šovā, paruodē pa televizoru, bet nu tuo nikas daudz nasamaina.

Jogita: Mes napīsadalejom, lai kliutu pazeistamys, lai myus ruodeitu pa televizoru. Tys beja vinkuorši izaicynuojums. Puorbaudejums. Avantura. I grybiejuos ari tūs Fiskars pīškmatys. Grybātu izduovynuot vacuokim, jī byutu pīrceiguoki kai ir itūšaļt.

Jolanta: Daudzi raksteja, ka "vecāki var lepoties ar jums". Es tik teišom dūmoju, ka jī tū var dareit.

Skaiteju internetā, ka daudzi gribēja, lai jius uzvarit...

Jogita: Jā, daudzi raksteja, kai vajagūt vysim sasamest deļ tim Fiskars pīrkšmetim, deļ myusu.

Jolanta: Kod beidzēs šovs, nuokušā dīnā es aizguoju iz dorbu, maņ kolegi izduovynuoja Fiskars ponnu i nazi. Tei beja kai mīrynuojuma bolva. Jogitai ari. Tys beja tai cīši jauki nu jūs pusīs. Jī atbaļsteja i cerēja.



Tod saīt, ka jius itymā šovā pajiemot sovu vītu ar čaklumu?

Jogita: Divejis reizis mes bejom kai čakluokuos atzeitys — pirmajā i pādejā raidejumā.

Tys, ka jius esit nu laukim, jiusim koč kai paleidzēja šovā?

Jolanta: Jā, mes taidys spieceigys. Bet beja taidi dorbi kai byuvnīceiba, kur mums vajadzēja tuos muojenis ceļt, kas it kai vaira ir veirīšu dorbs.

Myus būvnīceibys jūmā nabeja nikaidys pīredzis, jo parosti sātā tūs dorbus dareja bruoli.

Jogita: Cīši daudz spīde iz iztureibu. Jo vysu laika vajadzēja vysu dareit mudri. Beiguos tī aizdavumi ari beja daudz gryutuoki. Kod beja pādejais aizdavums, es jau dūmovu, ka Jolanta gokus atdūs. (Smejās.)

Jolanta: Tī beja tei zuoluoja īreikuošana. Tys beja nanormali gryuts. Mes nikod īprikš tai nabejom aizadūmuojušys, kuo tuodu zuoluoja kluoj. Mes parosti sātā darejom, kuo jau cyti saceja — nūber zemi i īsiej zuoli. Bet, kod ir juoaprūk zemi, tūlaik juorūk tī zuolis pakluojeni, juovad i juosalīk... Tys beja smogai.

Jogita: Piec tam ari iz reizes beja pusfinals i finals. Beja sajiuta kai taidam nūdzeitam zyrgam.

Jolanta: Mums pusfinalā beja vīna veiksmē — aizkurynuot gunkuru i izkuopt stabā. Div veiksmis navar byut. Es ari tī čaikstēju, peiksteju, ka navareišu... Bet, kod vajadzēja, es izkuopu stabā i mes īkurom tū gunkuru. Tai mes tykom finalā. Piec tam aizguoju da tuo stoba, dūmuoju, ka ir juoizkuop vēļ reizi, bet es navarēju — beja paniskys bailis. Nav saprūtams, kai es varieju tod, pyrms pusstundis izkuopt...

Jogita: Ari tys gunkurs — vyss beja tik škeists, puors stundis īprikš beja nūlejs leits, gryuts beja īkurynuot. Jolanta atnese kuorklu lopys, tuos gon labi aizguoja. Tai mes ūtruos puordadzynuojam tū aukleņu i tykom finalā.

Jolanta: Reali mes izdarejom vysu tū pošu, kū pyrmo komanda. Kod Rūdis atnese eistū atslāgu, mes ari jau skriejom ar pīktū atslāgu. Mes tikai lānuok skriejom... Maņ beja drusku škrobe.

Jogita: Bet nikuo, puordzeivuojom.

Jolanta: „Ar smaidu uz lūpām” stuvējom finalā. Ir juomuok zaudeit. Nu nabeja tei lela zaude...

Jogita: Nu beja jau. Bet taipoš mes asam daudz īgivušys — kameruos runuot i ryudejums.

Kai jius asot mainejušuos pēc šova? Kaidi īgivumi?

Jolanta: Es vairuok nūvierteju Jogitu kai cylvāku, kai muosu...

Jogita: Mes agruok varējom pazvaneit vīnu raizi nedēļā vīna ūtrai, tys beja piļneigi normali. Niule, ka jei kotru dīnu napazvona, līkās jūceigai. Mums ir mīļukys, lobuokys attīceibys.



Tod saīt, ka šovs jius satyvynuoja.

Jolanta: Jā, es dūmoju, ka myusu attīceibys ir palykušys lobuokys, vīnnūzeimeigi. Es varbyut vaira nūvierteju iz kū Jogita ir spiejeiga, jo es agruok naticieju, ka jei varātum, kur izkuopt. Maņ lykuos: „Nu, ka es varātu, nu na jau Jogita”, a tagad ruodīs: „Jogita varātum, na jau es”. Vīna ūtrai tik cīši naapneikstam — varbyut ari asam izauguš...

Kai ir jaunīšam mienesi dzeivuoat bez veikala, telepona i interneta?

Jogita: Nu suokuma beja cīši gryuts pīrast. Bet iz beigom, kod palyka naz cik dīnu da šova beigom. Mums vairs navajadzēja telefona, nikuo vairs navajadzēja.

Jums ar zyrgim ari nabeja nikaidys pīredzis...

Jolanta: Nu jā, nu molys verūtīs ruodīs, nu kas tys zyrgs, bet kod tu siedī jam mugurā... Maņ beja baist. Ar jim ir juoprūt, kod tur juodavalk, kod tur juodasyt kuojis, tī ir juozyna...

Jogita: Vyss kas beja ar zyrgim saisteits, maņ beja baileigi, gon maudynuot, gon staiguļuoat ar jim reizē. (Mums sātā koč kod seņ beja zyrgs, kaidus 15 godus atpakaļ...) Nabeja pīrosts ari tys, ka pa goldu staigoj kozys. Vīnu reizi Jolanta koč kū dareja pīsalīkuse i jai iz mugurys izlēce koza — stuov i verās apleik. Vēļ beja vīns smīkleigs atgadejums. Mes rokom tūs zuolis kvadratus, aplūkā beja taidis draiskuleigs zyrgs Rufuss. Mest tī struodojam, jis pītīt Jolantai nu aizmugures (Jolantai beja biksis ar gumeju), pajam ar zūbim tū bikšu molu, atvalk i palaiž. Jolanta tai sasabeida... Tys beja smīkleigi.

Jolanta: Jā, tuods tys zyrgs beja, kūde vysur, kur var īkūst. (Smejās.)

Voi jums beja ari kaidis breivais laiks?

Jogita: Nā, nabeja.

Jogita: Pīmāram, tū zuoluoja kluošonu paruodeja 5 minoty, bet reali mes jū kluojom 18 stuņdis.

Jolanta: Veļ vins taidis pīdzeivojums, kū mes pēc šova izdarejom — sataisejom tetoviejumus. Gribiejuos koč kū taidu izdareit, kas palīk pruoatā i vīnoj. Obom divom vīnuodus — spuoris.

Jogita: Eistineībā es dūmoju, ka itys pīdzeivojums ir naaizmierstams. Niule kuo atguodynojuoms i suvenirs sekcejā stuov „Lauku sētas” škeivs, nasasysts. Rūdim ar Mairitu ari palyka, cyti reali laseja lauskys, lai par pīmiņu palīk... Veļ mes grybom ītraksteit tuos vysys serejis, kū ruodeja pa TV, lai pēc tam varātu pasavērt i par sevi pasasmīt.

Šovā jius bejot vīnys nu taidom pozitīvuokajom, varieja redzeit, ka jums nav vīnolga, kai jius paruodeis. Taidu atbiļdeibys sajiutu varēja just...

Jolanta: Es drusku par tū dūmoju, kai es izavieršu. Beja šaļts, kod teišom gribiejuos nūsalomuot, bet es raudzieju sevi drusku nūtureit. Varēja jau, prūtams, ļaut sovom emocejom vali, bet deļkam tys ir vajadzeigs...

Jogita: Beja taidi dalinīki, kas nikur nastruodoj, kuram nikas itymā šaļtī dzeivī nainterešej i jim beja vīnolga, kai jūs paruodeis... Es grybātu, lai cylvāks mani īraugūt smaida, navys nūsavierš.

Es veļ redzieju tū sereju, kur jums vajadzēja zyrgim capureitis tambureit...

Jolanta: Rūkdorbi nav myusu stypruo puse. Školā, kod vajadzēja kū adeit voi tambureit, parosti tante vysu paliedzieja. Tymuos šaļtīs, kod līk dareit tū, kū naprūti — izīt taida panikys lēkme ar dūmom: „Es navareišu, es naprasšu, man nasaīs”, tod nūsamīrej i verīs, kū vari dareit lītys lobā.



Jogita: Da gola mums saguoja zyrga „Čuču cepure”. Daudzi saceja, ka poša smukuokuo bejus. Es nūtambūrieju vīnu peineiti, Jolanta šyva, bet rezultats beja lobs.

Jolanta: Itymā šovā ir juobyun gotovam vysaidim aizdavumim, na tikai lauku dorbum. Mums ruodejuos, kas tī gryuts, lauku dorbus mes pīrodušs dareit... Bet tī daudzi aizdavumi tuodi pagryuti beja, naikdīniški. Beja aizdavumi, kuri lobuok saguoja man, kuri — Jogitai. Tai mes vīna ūtru pavylkom.

Jogita: Kod vieromīs īprīkšejū sezonu, ruodejuos, ka tī nav nivīna taida dorba, kū es navarātu izdareit.

Jolanta: Vysu šova laiku beja sajiuta, ka esi īgrūžuots, ka esi kruoteņā. Ka Tev kaidis soka, kas ir juodora, ka tu navari pamest teritoreju.

Jogita: Pyrmuos dīnys tu tam vysam pretojīs, a piec tam pi tuo pīrūņ i ruodīs, ka vyss ir labi... Tod dūmoj, kai tys byus, kod tiks prūjom i nivins nasaceis, kas tev kurymā šaļtī ir juodora.

Jolanta: Kod beidzēs šovs, beja sajiuta kai breivam putynam — tu vari dareit, kū gribi.

Jogita: Kod tu beidzūt esi tics breiveībā, prīceigs ej pa piļsātu, nivins jau nazyna, kur tu beji, bet ir tuoda jūkaina sajiuta, ka vysy zyna...

Kai jums beja otkol tīt atpakaļ ikdīnā?

Jolanta: Es iz raizes aizguoju struoduot, jo beidzēs atvalinojums. Nabeja taida eisti puorejis perioda. Dorbā beja pagryuts īsasuokt, jo mienesi nikas natyka dareits.

Jogita: Cytim rodejuos, ka tu mienesi atsapyuti.

Jolanta: Maņ dorbā praseja, kur es beju aizbraukuse... Es tik smaideju, nazynuoju kū eisti saceit... Mes daudzi navarejom ari stuosteit.

Jogita: Šova laikā mes sovā storpā, taipoš kai sātā i niule, ari runuojom latgaliski, tī var dziedēt... Grybātum pasaceit ari cytim jaunīšim, ka ir izdeveiba, var pamieginuot pīsadaleit. Dzeivojam tok vīnu reizi. Ir interesanti, ir interesanti...

Šovu "Lauku sēta" niule var apsavērt internetā, pēc adresa: skaties.lv, sadaļā "Izklaide", tematūs "Lauku sēta".

Sagataveja: Dagneja Dudarjonoka